



ATIF KUJUNDŽIĆ, književnik

POETIKA CRNO BIJELIH MOGUĆNOSTI

u povodu samostalne izložbe fotografija Milana Latinovića - BKC Tuzla

Milan Latinović, /Medeno polje, Bosanski Petrovac, 1933., profesionalno i s kreativnim uklonom, fotografijom se bavi duže od 50 godina. U nivou tehničkog postignuća i rezultata istinski znalac, Latinović je svoj inventivni poticaj i kreativni impuls razvija unutar crno -bijele fotografije i naslanja na čovjekov odnos prema svijetu i zadatost čovjekovog mesta u okruženju. Na fotografijama Milana Latinovića čovjek živi u svijetu koji mu je suprotstavljen i nenaklonjen bez ostataka. O tome u jednakoj mjeri svjedoči Latinovićev odabir motiva, ali i nedvosmislena odabranost motivom njega kao fotografa. Naime, i najveća koncentriranost na odabir motiva, biva i transformira se u odabranost motivom, jer prvotni impuls dolazi iznutra i tek: pronalazi svoju potvrdu i postvarenje u vanjskom svijetu.

Latinovićevo bavljenje fotografijom, u tom smislu, sudbinski je uvjetovano.

U produžetku, možemo reći kako Latinovićeva fotografija i njezina nominacija, /a: nomen est omen/, opstaju unutar krajnje i isključivo ljudskih kategorija i bez nastojanja relativiziranja ili pronalaženja opravdanja ili, nekog drugog nivoa funkciranja znaka. Tako, nominacija postaje reliktom oporog realizma u ljudskom životu i dokazom krajnje unutarnjeg, osobnog doživljaja na fotografiji. Naime, isušeno, skorenio i raspucano blato/ilo, Latinović nominira kao Žed, što čovjeku ispred fotografije ili slike u prirodi i nije asocijacija, već sušti realitet. Na grupama zdrobljene i isušene zemlje sjedi čovjek u crnom, zagledan u nepoznatu daljinu, a njegovu golo/izbjrijano tjeme, dobij a cjelovit i podudaran smisao u nominaciji Monah, pa biva pečatom isposništva u teškom radu na škrtoj zemlji i neizvjesnosti svake, pa i Božije nagrade. Dakle, Milan Latinović, nedvosmisleno, nominira svoje fotografije s namjerom da u njima identificira krajnje osobno osjećanje i viđenje svijeta. Kako je u okviru ove postavke, dominantno, riječ o crno - bijeloj fotografiji, u poziciji smo razabrati karakteristike koje na fotografijama Milana Latinovića opstaju i bivaju konstantama njegovog fotografskog bavljenja/izraza. Riječ je o analognoj fotografiji i nesumnjivoj naklonjenosti krupnozrnastim teksturama negativa i pozitiva koje kazuju sve u rasponu od bijelog do crnog, ali uвijek i o promišljeno, obavezno instaliрanim akcentima čisto bijelog, koje na fotografijama funkcionira kao pečat i ovjera autentičnosti njihovoga sadržaja. Akcenti bijeloga, Latinoviću služe i da bi stvorio vrlo čvrstu kompoziciju koja djeluje uravnoteženo i smirujuće, koja potiče na razmišljanje o protjecanju vremena.

U istom znaku, javljaju se i Latinovićevi portreti, ljudska lica su sušto, uhvaćeno i u čovjekovom osjećanju odraženo vrijeme. Orlovski vidik - u moru bijelih oblaka plove crni vrhovi brda. Proleće - je oranje volovskom zapregom s kolima u prvom planu, ali i bjelina snijega na padini i bijeli trag mlaznjaka u nebu. Ustvari, bjeline na fotografijama Milana Latinovića su akcenti koji dovršavaju prizor, sliku.

Nekoliko izloženih kolor fotografija, sugeriraju nam Milana Latinovića kao snažnog i raskošnog vizuelnog lirika. Takve su fotografije: portret žene i panorama Vranduka /1966./. Etc.

Fotografija Milana Latinovića je konstanta svjetlosnih vrijednosti uhvaćenih i ovjekovječenih fotografskim aparatom u novijem vremenu razvoja fotografije u Bosni i Hercegovini, a na način, da zatvara prostor misaono i refleksivno produbljenog viđenja, ustvari, klasičnog bavljenja fotografijom.